



PRESS STATEMENT

Impase política dadauk ne'e la'os afeita deit ba dezenvolvomentu ekónomiku país nian, maibé afeita dadauk ona liberdade impresa no liberdade espresaun iha railaran. Politizasaun ba instituisaun mídia públíku nu'udar forma estratéjia política ida atuhodi interven política redasaun RTTL E.P. no Ajénsia Tatoli nian. Pesoál balu Instituisaun Estadu no Governu nian hahú ameasa no bandu jornalista sira atu labele espresa sira nia hanoin no pensamentu kona-ba asuntu sira ne'ebé relasiona ho interese públíku nian iha plataforma sira mídia sosiál. Ameasa ne'ebé Xefe Gabinete, Sekertáriu Estadu Komunikasaun Sosiál (SEKOMS), halo hasoru Jornalista RTTL E.P. Constancio Vieria iha loron 11 Janeiru 2019 nu'udar hahalok ditadura ne'ebé la afavor ba prinsipi liberdade impresa no liberdade espresaun iha nasau demokrátiku ida-ne'e. Xefe gabinete ne'e ameasa atu hasai Jornalista Constancio Vieira husi nia knaar nu'udar jornalista RTTL E.P.

Desizaun Ministériu Negósiu Estranjeiru no Kooperasaun (MNEK) nian hodi hapara distribuisaun Jornál Independente nian mós nu'udar forma sensura (ka censorship) ida ba fluta informasaun iha país demokrátika Timor-Leste no ida-ne'e nu'udar forma impedimentu ba direitu sidadaun nian hodi asesu ba informasun ne'ebé hatuur iha Konstituisaun RDTL. Atuasaun pesoál ka indivíduu balu Polísia Nasional Timor-Leste (PNTL) nian hasoru jornalista ka Editór Timor-Post, Carlos Malilaka foin dadauk ne'e iha Bebonuk-Dili nu'udar mós aktu asesivu no ameasa ida ba liberdade jornalista nian atu halo kobertura ba problema sira ne'ebé mosu iha sosiadade nia leet.

Bazeia ba situasaun no faktu sira ne'ebé mensióna iha leten, Asosiasaun Jornalista Timor Lorosa'e (AJTL) nu'udar organizasaun mahon ba jornalista Timoroan hotu-hotu hakarak hato'o nia pozisaun hanesan temi-tuir mai:

1. Kondena maka'as aktu ka hahalok ameasa husi xefe gabinete SECOMS, Julio Gonçalves hasoru Jornalista Constancio Vieira tamba ida-ne'e nu'udar hahalok arogante no ditadura ne'ebé la afavor ba valor demokrasia, liberdade impresa no liberdade espresaun iha nasau demokrátiku Timor-Leste.
2. Kondena Maka'as desizaun Ministériu Negosiu Estranjeiru no Kooperasaun (MNEK) nian ne'ebé hapara jornál Independente nia distribuisaun. Hahalok ne'e la refleta atitude instituisaun demókratiku ida tamba impede sidadaun sira nia direitu atu asesu ba informasaun.

- 78
3. Kondena maka'as atuasaun indivíduu ka pesoál balu PNTL nian ne'ebé ameasa no hadau Jornalista ka editór Timor Post, Carlos Malilaka nia kamera iha area Bebonuk. Aktu ida-ne'e nu'udar aktu krime ne'ebé ameasa liberdade imprensa no liberdade jornalista nian hodi asesu ba informasaun.

Ho pozisaun ne'e, AJTL husu ba:

1. Xefe Governu, Priméru Ministru Taur Matan Ruak atu hasai Xefe Gabinete SEKOMS, Julio husi nia kargu tamba nia atitude la apoiu dezenvolvimentu mídia no liberdade imprensa no liberdade espresaun iha Timor-Leste.
2. Husu mós ba Priméru Ministru Taur Matan Ruak (TMR) ato fó samada atensaun ba Ministéiru Negosiu Estranjeiru no Kooperasaun tamba halo desizaun kontroversu ida-ne'ebé la afavor ba liberdade flutu informasaun iha país foun ne'e.
3. Husu ba Konsellu Imprensa (KI) nu'udar institusaun Estadu Independente ida-ne'ebé promove no defende liberdade imprensa no liberdade espresaun iha nasaun ne'e atu haree situasaun ne'e tamba liberdade imprensa no liberdade espresaun iha país ne'e hahú ameasadu.
4. Husu ba Komandu Polísia Nasionál Timor Lorosa'e (PNTL) atu eduka no tau-matan ba ninia elementu sira atu respeitu no tanea-aas jornalista no mídia nia serbisu bainhira hala'o serbisu iha terenu.
5. Husu jornalista hotu-hotu no kanál mídia sira atu mantein independénsia editoriál tuir prinsipiu universál jornalizmu no Kódigu Ética jornalizmu hodi tane-aas nafatin interesse povu nian, la'os sai porta voz ka sai corong político ka governu nian.
6. Husu ba político sira ka governu iha futuru atu para ona halo politizasaun ba institusaun mídia públiku RTTL E.P, Tatoli no mídia profisionál sira seluk tamba institusaun mídia hirak ne'e la'os institusaun política atu ema ka grupu ida politiza tuir sira nia hakarak. Kanál mídia sira ne'e nu'udar institusaun mídia profisionál atu halo kontrolu sosiál hodi garante transparensia no kontabilidade iha país demokrátiku ida-ne'e.
7. AJTL mos husu ba institusaun media sira hodi hatoo ba jornalista sira atu bele uza journalismu ba paz hodi halo kobertura liga ho situasaun politika ko polemika ne'ebe akontese dadauk, atu nune'e servisu journalismu la hamosu konflitu liu kobertura no husu ba Konselho Imprensa para kontinua nafatin tau matan ba institusaun media sira hodi hare ba kontiudu nutisia ne'ebe mak dalaruma sei hamosu konflitu no rekomenda atu bele uza journalismu ba paz ba iha situasaun balun.